

# Agensi maritim negara pameran ketangkasan di LIMA'25

Oleh **MUHAMAD AIMY AHMAD**  
utusannews@mediamulia.com.my

**LANGKAWI:** Perdana Menteri, Datuk Seri Anwar Ibrahim merasmikan pembukaan segmen maritim pada Pameran Udara dan Maritim Antarabangsa Langkawi 2025 (LIMA'25) di Resort World Langkawi (RWL) di sini, semalam.

Gimik perasmian kali ini menyaksikan penyusupan oleh anggota penyelam taktikal Tentera Laut Diraja Malaysia (TLDM) dan Polis Diraja Malaysia (PDRM) yang terjun daripada pesawat dan tiba di hadapan pentas dengan membawa kotak hitam berisi kad slot untuk diaktifkan Perdana Menteri.

Demonstrasi seterusnya mempamerkan keupayaan bot-bot dan luncur jet (jet ski) daripada pelbagai agensi maritim yang melakukan pergerakan taktikal.

Selain TLDM dan PDRM, turut terlibat adalah Jabatan Kastam Diraja Malaysia (JKDM), Agensi Penguatkuasaan Maritim Malaysia (Maritim Malaysia), Jabatan Bomba dan Penyelamat Malaysia (JBPM) dan Jabatan

Perikanan.

Perdana Menteri turut dipertontonkan demonstrasi keupayaan maritim menggunakan konsep *inter-agency coordinated rescue mission* yang mempamerkan aksi dan kepakaran gabungan Pasukan Khas Laut (Paskal) TLDM, Unit Gempur Marin PDRM, Pasukan Tempur Operasi Medan Kastam (Cobra), Pasukan Tindakan Khas dan Penyelamat (STAR) Maritim Malaysia dan Jabatan Laut bersama aset permukaan dan udara.

Adegan terakhir adalah lintas hormat (*fly-past dan sail-past*) melibatkan aset udara dan permukaan yang terlibat sepanjang sesi demonstrasi sebagai penghormatan kepada para tetamu yang hadir di pentas utama.

Turut hadir, Menteri Pertahanan, Datuk Seri Mohamed Khaled Nordin; Menteri Besar Kedah, Datuk Seri Muhammad Sanusi Md. Nor; Menteri Luar, Datuk Seri Mohamad Hasan dan Menteri Komunikasi, Datuk Fahmi Fadzil, Panglima Angkatan Tentera, Jeneral Datuk Mohd. Nizam Jaffar dan Timbalan Menteri Pertahanan, Adly Zahari.



**ANWAR** Ibrahim melawat model kapal tempur pesisir (LCS) yang dibina dari blok binaan sempena LIMA'25 di Pusat Pameran Antarabangsa Mahsuri Langkawi, Kedah, semalam. - UTUSAN/FARIZ RUSADIO